

大清會典
禮部



皇后宮朝賀儀

凡元日長至次日

皇后千秋節。内外文武官。皆豫期進箋稱賀。是日。皇后朝於

皇太后

皇帝乃

御交泰殿。行慶賀禮。五鼓。内鑾儀衛。陳儀駕於殿前。陳車輿於

乾清門外。均東西相嚮。内監。陳中和韶樂於交泰殿檐下。陳丹陛大樂於儀駕之南。均左右北



嚮設

貴妃

妃

嬪拜位於

殿檐前。公主王妃以下。二品以上。命婦均朝服。集隆宗門外。至時

貴妃率

妃

嬪具禮服詣

交泰殿。陞丹陛。序立於

殿前東西嚮。內監引公主王妃。命婦由隆宗門入

內右門。公主王妃。命婦序立於丹陛左翼西面。右翼東面。均北上。引禮女官奏請

皇后御殿。內監接奏中和韶樂作。奏淑平之章。皇后禮服陞座。樂止。引禮女官引

貴妃

妃

嬪就拜位立。公主王妃。命婦各就拜位立。東班西上。西班東上。均北面。丹陛樂作。奏正平之章。行

六肅三跪三拜禮畢樂止引禮女官引

貴妃

妃

嬪復位立公主王妃命婦各復位立引禮女官奏

禮成中和韶樂作奏順平之章

皇后還宮樂止

貴妃

妃

嬪各還宮公主王妃命婦以次出內監引

皇子詣

皇后宮行禮



